



Aqqa Samuelsen  
Inatisartunut ilaasortaq, Inuit Ataqtigiit

### § 37 naapertorlugu apeqqut 136/2019-imut akissut

#### 1. Qasigiannuani kigutileriffiup illutaa suna pissutigalugu matuneqarnikuunera Naalakkersuisut erseqqinnerusumik paasissutissiisnaappat?

**Akissut:**

Qasigiannuani kigutileriffik peqqissaavimmut nuutsinneqarallarpoq 5. maj 2018-imi. Nuutsinermut pissutaavoq kigutileriffimmi misissuinerit takutimassuk annertuumik oqummik peqartaq.

#### 2. Qasigiannuani kigutileriffiup illutaata iluarsartuuteqattaarnikuunerata ingerlarna, qanorlu aningaasartuutaatigisimansoq Naalakkersuisut paasissutissiisnaappat?

**Akissut:**

Marloriarluni oquiaaneq ingerlanneqarsimavoq, oquiaanermi siullermi oquk tamakkiisumik peersimangimmat. Tamatuma kingorna kigutileriffimik misissuisoqaqqippoq oquup annertussusaa misissorneqaqqilluni. Katillugu sanasunut misissuinerit ilanngullugit aningaasartuutit 643.678,85 kr-iupput.

#### 3. Piffissami aggersumi Qasigiannuani kigutileriffimik nutaamik sanaartornissamut Naalakkersuisut pilersaaruteqarpap?

**Akissut:**

Naalakkersuisut Qasigiannuani kigutileriffimik nutaamik sanaartortoqarnissaa pilersaarutiginnilaat. Tamatuma saniatigut apeqqummut 3a-mut akissummut innersuussisoqarpoq.

- a) **Akissut aappiuppat: nutaamik sanaartortoqassappat qaqugu sanaartorneq aallartinneqassava? Tamannalu aningaasanngorlugu qanoq naleqassava?**

**Akissut:**

Kigutileriffik maanna peqqissaaviup iluani inissinneqassaaq, t.i. peqqissavimmi atortut allamut inissinneqassapput kigutileriffimmut inissamik pilersitsiniarluni.

Suliniut maanna suliarineqaleruttoq, ukiumilu matumani naammassineqassasoq naatsorsuutigineqarpoq. Siunnersuisup aki missingiutaa 2.100.000 kr.-iuvoq.

21-03-2019  
Sags nr. 2019 - 6927  
Akt nr. 10340412

Postboks 1160  
Tlf: 34 50 00  
Fax: 34 55 05  
3900 Nuuk  
Email: [pn@nanoq.gl](mailto:pn@nanoq.gl)  
[www.naalakkersuisut.gl](http://www.naalakkersuisut.gl)

**4. Qasigiannuani kigutilerisussaaleqineq aaqqiissuteqarfiginiarlugu Naalakkersuisut qanoq pilersaaruteqarpat?**

**Akissut:**

Kigutilerisunik aalajangersimasumik atorfilinnik amigaateqarneq ajoraluartumik Qasigiannuani kisimi ajornartorsiutaangilaq. Kisianni nuna tamakkerlugu kigutilerisunik aalajangersimasumik atorfinitsitsinissaq ajornartorsiutaavoq, taamaattumillu peqqinnissaqarfik ilaatigut qitiusumik immikkoortortaqarfinni pilersaarummik suliniuteqarpoq, taamaasilluni kigutilerisut aalajangersimasunik atorfillit najukkami pisaqartitsineq malillugu aaqqiissusussaannikkut eqaannerusumik agguarneqarsinnaangorlugit.

Maannakuugallartoq Qasigiannuani kigutilerisumik atorfinitsitsinissaq periarfissaangilaq, taamaattumik peqqinnissaqarfik kigutilerisunik piffissani sivikinnerusuni Qasigiannuaniittussanik aallartitsisarpoq. Tulliani 1. aprilimit 1. juni 2019-ip tungaanut.

**5. Ukiuni kingullerni tallimani kigutilerisutut ilinniartut aallartittartut qanoq amerlatigippat?**

**Akissut:**

Ukiuni tallimani kingullerni kigutilerisutut ilinniakkamik ataaseq aallartitsisimavoq.

- a) **Taakkunanga qanoq amerlatigisut ilinniakkaminnik naammassinnittarpat?**

**Akissut:**

Ukiuni tallimani kingullerni kigutilerisutut ilinniakkamik ataaseq naammassinnissimavoq.

**6. Ukiuni kingullerni tallimani kigutigissaasutut ilinniartut aallartittartut qanoq amerlatigippat?**

**Akissut:**

Peqqissaanermik ilinniartuup paasissutissiissutigaa kigutigissaasutut ilinniagaq ukiut marluk ilinniartuusoq ukioq allortarlugu aallartinneqartartoq. Holdit naammassisut kingullit takussutissaat ataaniipput.

Ukioq	Ilinniartut amerlassusai	Ilinniakkamik naammassinnittut
2011-2013	7	7
2015-2017	11	6

2019-imi holdit nutaat aallartissapput, qinnuteqaatilli suli suliarineqanngillat.

- a) **Taakkunanga qanoq amerlatigisut ilinniakkaminnik naammassinnittarpat?**

**Akissut:**

Apequt 6-imut akissut takuuk.

## **7. Nunatsinni kigutilerisutut ilinniarsimasut katillugit qanoq amerlatigippat?**

### **Akissut:**

1. april 2019-imi Kalaallit Nunaanni kigutilerisut aalajangersimasumik atorfillit 13-iupput, taakkunani arfineq pingasut Nuummi atorfeqarput. Kigutilerisut piffissami sivikinnerusumi atorfeqartut 17-iupput, taakku piffissani sivikinnerusuni qaammatit 3-6-it akornanni atorfinitsinneqarput.

### **a) Nunatsinni kigutilerisutut ilinniarsimasut sulisorineqartut illoqarfikkaartumik nunaqarfikkaartumillu qanoq amerlatigippat?**

### **Akissut:**

Illoqarfinni amerlanerpaani kigutilerisumik ataatsimik atorfeqartoqarpoq. Tamatuma saniatigut Sisimiut Ilulissallu pingasunik kigutilerisoqarput, Qaqortoq aamma Aasiaat marlunnik kigutilerisoqarlutik kiisalu Nuuk maannakkuugallartoq arfineq-pingasunik kigutilerisoqarluni. Nunaqarfinni kigutilerisoqanngilaq, nunaqarfiit immikkoortunit sullinneqartarmata.

## **8. Nunatsinni kigutigissaasutut ilinniarsimasut katillugit qanoq amerlatigippat?**

### **Akissut:**

Maannakkorpiaq oqaatigineqarsinnaavoq nunami kigutigissaasut 26-iummata.

### **a) Nunatsinni kigutigissaasutut ilinniarsimasut sulisorineqartut illoqarfikkaartumik nunaqarfikkaartumillu qanoq amerlatigippat?**

### **Akissut:**

Kigutigissaasut amerlassusai innuttaasut amerlassusaat naapertorlugit agguataarneqarput. Maannakkorpiaq immikkoortut ilaat kigutigissaasoqanngillat, amerlasuut Nuummi sulerusuttarnerat pissutigalugu. Nunaqarfiit kigutigissaasoqanngillat, nunaqarfiit immikkoortunit sullinneqartarmata.

## **9. Nunatsinni kigutilerisutut ilinniarsimasut qanoq amerlatigisut amigaatigineqarpat?**

### **Akissut:**

Maannakkut 1. april-imit Nuummi kigutilerisutut atorfiit marluk inuttaqanngillat, immikkoortunilu ataasiakkaani atorfiit qaammatini 4-ni ataasiakkaat inuttaqanngillat. Kigutilerisunik atorfinitsitsiniarnermi annertuumik ajornartorsiuteqarneq pissutigalugu peqqinnissaqarfik kigutilerisunik piffissami sivikitsuinnarmi arlalinnik atorfinitsitsisarneq atortariaqarpaat. Atorfinitsitsinerit taakku qaammatinik 3-6-inik sivisussuseqartarput. Taamaattumik sulisoqarneq qajannarpoq, sivikitsumillu atorfeqartitsinerit amerlassusai pissutigalugit qaammammit qaammammut allanngorsinnaalluni. Ilanngullugu kigutilerisut aalajangersimasumik atorfeqartut amigaatigineqarnerat isumaqarpoq, kigutileriffinni ataannartarnerni kiisalu suleqatigiinni ataqatigiinnermut atatillugu unammillernartoqartoq.

### **a) Nunatsinni kigutilerisutut ilinniarsimasut amigaatigineqartut illoqarfikkaartumik nunaqarfikkaartumillu qanoq amerlatigippat?**

### **Akissut:**

Apequt 9-mut akissut takuuk.

**10. Nunatsinni innuttaasut kigutiginnerulernissaat anguniarlugu Naalackersuisut qanoq suliniuteqarpat?**

**Akissut:**

Nuna tamakkerlugu innuttaasut kigutigissusaat pitsanngorsarniarlugu Kalaallit Nunaanni kigutilerisarnermi suliniutit arlallit ingerlapput. Matuma ataani ilaatigut taaneqarsinnaavoq meeqqat inuusuttullu pillugit cariesimut periusissiaq iluatsilluartoq, tassani kigutit misissorneqarnissaannut aggersaasoqartarpoq kiisalu pinaveersaartitsineq kiisalu angajoqqaat peqataatinneqarnerat akisussaaffeqarnerallu ukkatarineqarlutik. Periusissiaq anguniakkamik angusaqarfiusinnaasutut sunniuteqartoq takuneqarsinnaavoq, tassani suliniummik sullinniakkani meeqqani inuusuttunilu kigutigissutsip qaffakkiartuaarnera takuneqarsinnaammat. Pingasunit arfinilinnut ukiulinnut anguniakkat assersuutigalugu piviusunngortinneqarput. Cariesimut periusissiaq 2008-mi aallartinneqarpoq, qanittumilu ukiunut 2019-2024-mut aaqqissuunneqaaqqammerluni. Tamatuma saniatigut 2019-imi nuna tamakkerlugu atuarfinni fluorimik salisarnarit aallartisarneqarput. 2019-imittaaq imigassat seernartut/tungusunniut taakkualu syret kigutinut ajoqusiisarneri pillugit 6. klassinik atuartitsisarneq aallartisarneqarpoq. Inersimasut kigutileritittarneri matuma ataani kigutaasiornerit pillugit suliassaqarfimmi inatsisitigut aalajangersakkat malinneqarput, taakkunani erserpoq meeqqat inuusuttullu pingaarnertinneqartut. Tamanna inersimasut kigutileritittarnerinut iluaqutissat amigarnerinik kiisalu kigutileritinnissamut, soorlu kigutaasartaarnissamut utaqqisoqartarnerinik malitseqarpoq.

**11. Nunatsinni kigutilerisutut kigutigissaasutullu ilinniarsimasut sulisoriinnarnissaat qulakkeerniarlugu Naalackersuisut qanoq pilersaaruteqarpat?**

**Akissut:**

Peqqinnissaqarfimmi sulisoqarniarneq pillugu § 37 9/2019-imut akissummut innersuussisoqarpoq.

**12. Nunatsinni meeqqanik inuusuttunillu sumiginnaasarneq kinguaassiutitigullu atornerluisarnermut pasitsaassaqartarneq eqqarsaatigalugu kigutilerisut kigutigissaasullu piginnaasaat ilisimasaallu naammattut pigineqarpat?**

**Akissut:**

Peqqinnissaqarfimmi peqqinnissamik suliaqartut tamarmik sumiginnaanermut kinguaassiutitigullu atornerluisarnermut pasitsaassaqarnermi nalunaartussaataapput, tamanna pillugu nuna tamakkerlugu aamma iliuusissanik ilitsersuuteqarpoq.

**a) Nunatsinni meeqqanik inuusuttunillu sumiginnaasarneq kinguaassiutitigullu atornerluisarnermut pasitsaassaqartarneq eqqarsaatigalugu kigutilerisut kigutigissaasullu piginnaasaat ilisimasaallu qaffassaaviginiarlugit Naalackersuisut qanoq pilersaaruteqarpat?**

**Akissut:**

Aqutsisut nalilerpassuk tamanna pisariaqartinneqartoq, kigutileriffimmi sulisut tamarmik ingerlaavartumik pikkorissartinneqartarput.

Inussiarnersumik inuulluaqqusillunga  
Med venlig hilsen

  
Martha Abelsen